

四庫全書

史部

欽定四庫全書

史部

江西通志卷一百二十八

詳校官監察御史臣范東

檢討臣德生覆勘

總校官知縣臣楊懋珩

校對官中書臣潘庭筠

謄錄監生臣周元梓

欽定四庫全書

江西通志卷一百二十八

藝文 記七

元

相山重修保安觀記

虞集

撫州崇仁之南六十里有高厚博大之山焉曰巴山唐名臨川山今曰相山者也循其麓三百里有餘不能周升其巔升餘里而後至岐而上銳自郡城南出已望見

之邑之官舍民居當陽者莫不對面雲如縷出山中盤  
礴覆冒膏潤充溢衣被草木阡谷之容溝澮之通堰埭  
之瀦節宣蓄泄以為稼穡之備其利無窮矣是故吏民  
朝夕瞻仰一食必祝設不幸有旱溢祲沴之變土木螟  
蝗之孽無小大遠邇奔告稽首得所願欲乃已魏乎高  
哉穹窿欽岑之在望也其神明焉可誣哉而邑之父老  
言先漢時地本南昌西南之境梅君福尉南昌有所捕  
治至馬欒君巴為豫章太守亦有所効治于此二君有

仙道方術以輔其政化辟除邪暴禁止淫黷使民不逢  
不若離其災害是以德之而不忘皆有遺跡祠宇在山  
之支隴唐鄧君紫陽本郡人葉君法善縉雲人亦曰南  
城人皆嘗往來修真山中故宋時即山巔並祠此四君  
者而使道士守之梅藥山下之祀祭不廢乞靈之人以  
四君為歸矣紹興中郡守歷陽張公孝祥嘗刻石著其  
靈應而石亡久矣其文亦僅傳開慶己未用漕臣守臣  
言祈禱之應封四君為真人端平甲午加封真君皆有

褒稱咸淳辛未守臣四明黃公震端嚴有識士也至郡  
連旱大究荒政斥罷淫祀獨禱于社稷山川就郡城望  
拜茲山遣吏迎四君之象果得雨歲乃熟去為祥刑使  
者猶屬文道其事刻石山中俾後來者知敬恭明神而  
不陷昵于邪淫云內附國朝仍用道士主祠天子有詔  
書祀名山大川則守令奉詔敬祠歲稔守令還禱如故  
事民間之禱祀無所禁也然山高以險祈報嘗在夏秋  
時冬未寒山氣已凝為冰雪守者不能恒居四方冠褐

者黃緣汗合苟瓜華之微利人跡罕至則烏鼠散祠宇  
頽圯像設暴露農民顧瞻傷怛不知所出今監邑承直  
郎唐古保童大用奉詔書致祭見而感焉未暇及也在  
官之明年為後至元庚辰四月旱種不入土禱于山麓  
藥君之祠其應滂沛甚異七月又旱合羣祠而禱之亟  
迎四君之像皆至縣治又得雨郡吏以旱之迎禱四君  
者雨亦應而送神還山目其荒涼重以懼愧究其故則  
主祠者無固志之弊也邑中景雲觀道士黃處和請以

弟子嗣守而葺之至正辛巳歲九月克修四仙之祠道  
衆之舍門廡庖庫以次而舉山之人不敢昧其更始乃  
相與伐石而篆其事云

王文公祠堂記

至順二年冬中順大夫撫州路總管府達魯噶齊塔布  
台始至郡時守以下官多闕侯乃以民事為己任先事  
而憂惻怛周至平易之政人甚宜之雨暘稍愆若致自  
己且備且祈得不為菑歲豐時和郡邑安靜則求其所



當爲者而盡心焉明年故翰林學士吳公澄就養郡中  
過故宋丞相荆國王文公之舊祠見其頽圯而嘆焉侯  
聞之曰是吾責也乃出俸錢命郡吏董某譚某儒學直  
學饒約揭車使經營焉樂安縣達嚕嚕齊前進士實哩  
布哈興國路經歷前臨川縣尉張雱與郡士之有餘力  
者各以私錢來助經始于某年月日以某年月日告成  
侯介予從子宣傳其事于石按郡志宋崇寧四年郡守  
田登爲堂于守居之側肖公像而祠之淳熙十五年郡

守錢某更築祠而象山陸公九淵為之記公故宅在城東偏鹽步嶺有祠在焉作而新之則侯用吳公之言也郡人危素將重刻公文集吳公為之序既而吳公歿侯是以徵文于予也嗚呼昔人之言曰周公歿天下無善治奮乎百世之下必欲建立法度以堯舜其君民而又得君以行其志則未有如公者也陸吳二子之言既足以極公志之所存今昔不足于公者又有以盡破其偏私之蔽而世俗口耳相承之議遂無復容喙于其間雖

公復生亦將憮然于斯可謂千載之定論矣然則今侯  
新公祠豈直爲觀美也哉世之從政果如陸子所謂出  
乎老氏之緒餘者久已鮮矣而波頽風靡之中求如公  
之所謂因循所謂流俗而不足與有爲者亦且無之安  
得有如公立志操行者哉廉恥道喪士習愈下表而章  
之使人士拜公之祠瞻公之相誦公之文考公之行以  
求公之志而有所感發焉則貪者可以廉懦者可以立  
矣其于人心風俗豈小補哉若夫其所以爲學者陸吳

之言備矣學者尚有考焉

南豐曾氏新建文定公祠堂記

君子之欲行其道者時王之制有所不得爲則推其法  
意之所得爲而爲之此聖賢所以無不可行之時也昔  
者諸侯之國其昆弟子孫得以公族為大夫為士有田  
有祿以養之國有宗廟世守其祭祀百世之子孫祭于  
大宗五世之子孫祭于小宗而祖考之神靈盖有所歸  
矣後世貴爲公卿而無國邑惠澤無以徧及其族人

君子原本而充類盡然傷其心是以有置義田以待後人之冠婚喪祭者矣宗廟不立祭享無所君子思賢尊尊親親之道而不得有所爲焉于其賢者則緣夫尸而祝之于社之義而致其意則亦廢幾而已南豐曾氏自魯國公有六子其顯者三人文定公子固最賢子開之文如其兄而子宣最貴子固之學在孟氏既沒千五百年之後求聖賢之遺言帝王之成法于六經之中沛然而有餘淵然而莫測赫然爲時儒宗其文章深追古

作而君子猶以特公之一事云耳魯公沒時公弱冠未仕也家甚貧嫁孤妹九人必得其所奉母夫人至孝老死不哀蓋其根于天性者純明得于經學者深至所以行其道者衆人固不識也是以官爵不過于郡守俸入無踰于常僚然猶悉其貲力置義田于臨川郡城之後湖與屬邑金谿之南原立爲規約以惠利其族垂三百年矣此所謂能行其法意于可爲者乎不然何其能久也今其族孫元翊以其父正子之遺命作公祠堂于後

湖之上使其族之人食焉而思其本居焉而敬其身則公之遺意雖去之百世而烏有終窮者哉嗚呼公之至元翊八世矣于廟則已遠于社則已疏即其所遺田而祠之使羣情之渙者有所萃也不亦可乎元統癸酉祠堂成適予自京師歸臨川來求文以為記故為書此俾附諸義田規約之後而刻諸祠下云

新喻州重修宣聖廟儒學記

臨川路新喻州以渝水得名轉渝為喻不知所自起漢

以來已爲縣及宋置臨江軍新喻自宜春來隸之其治在四大山之中秀水淵注是以草木深潤人物俊異多出焉故宋在汴時劉侍讀啟生是鄉稽古淵茂有禮春秋之說史記典故之舊尤習焉與其弟若子博學洽聞名于一時與縉紳大儒先生蔚乎相望自是而後流風雅習代有足徵者矣其學校可知者始宋崇寧二年南渡後燬紹興三年令趙子琇始作之給事中李公大有爲之記紹熙二年令曾光祖修之工部尚書謝公諤爲



之記嘉定八年令董堦又修之寶謨閣學士章公穎爲  
之記及內附國朝至元二十二年乙酉邑人以部使者  
真定趙公秉政之命修學政新大成殿故宋太學博士  
廬陵劉公辰翁爲之記三十一年甲午縣陞爲州而學  
無所改作至元四年戊寅朝列大夫知州事彭城李侯  
漢傑始下車謁夫子廟慨夫五十四年之久而日敝弗  
葺也乃出俸金修職事以更飭廟學爲已任既成釋菜  
以告其地在城東虎瞰山之上俯臨澄潭氣象雄固得

石泉于荆榛之中甘潔可酌作神厨近之取其溉灌覈  
租入之蔽虧以續廩食蓄書籍以足誦讀範銅爲祭器  
與雅樂之器皆各有藏使前鄉貢進士丁鏐來求記之  
于是盡得諸先達前記而讀之未嘗不深嘆其人物之  
多文章之盛也如此嗟夫謝章二公以名法從爲鄉先  
生所以致意于後來學者皆拳拳于心術之正其言不  
可不深思之也謝公之言曰古之教也尚德今之學者  
尚文是欲其人之尚德也章公之言曰士而不知教此

漢唐之不可望乎三代者也望其人之修學也至矣方  
謝公為此學記時新安朱子自漳守退歸建陽從學者  
甚衆作考亭精舍以處之蓋是時朱子所定四經四書  
皆有成說周程張邵之遺言具有端緒于是學者趨乎  
聖賢之域正大而無所惑矣大人先生相望于數百里  
之間各有以治其邑者如此東南學問之不絕其可誣  
乎自偽學之禍興久之而後定及其說稍行學者不假  
之以便進取則墮于訓詁之相因雖其書之具存而得

之者亦或微矣渝學之士思其先正如侍讀劉公之博洽蕭正肅公之端雅遍觀于諸先達學記之言而深思夫謝章二公尚德修學之意凡予之所陳者皆所以自靖于尚德修學之事豈徒言哉

撫州路重修宣聖廟學記

河間袁公說之來治斯郡也期年政成官府輯睦平易不撓民安于無事尤以學校爲職分而究心焉謹學計之出入以備祭祀繕修師弟子之養比歲而益充教授

胡式甫至而遽以憂去不及有所爲學正李輯錄周復亨攝其事以學廟室宇敝壞告經歷前進士河南汪英曰今內朝清明外無繁令英得于此時畫諾簡書之暇學校之修非吾事而誰事也使工視夫棟梁椽桷之腐朽瓦甍之毀缺象設采色之黜翳者而謀新焉梓人度材陶人埏埴凡攻金攻石設色之工各執藝以待事自大成殿講堂書齋門廡易以椶楠豫章之美完以巧塤塗墍之堅鑿石作闌增禮殿之防和漆于丹侈桓楹之

飾南面之像侑食之容衣裳冠履儼然繡繪之有別凡  
爲米若干爲鈔若干則皆汪君晨至夕歸審度傭賈而  
無所隱欺是以敏于就事以稱其觀美者也至元六年  
六月朔日復亨與學訓導葉友聞以成事來告而請記焉  
集聞之春秋之法常事不書而斯役有不得不書者說  
易者有之君子之善治蠱者前事過中而將壞則可自  
新以爲後事之端而不使至于大壞後事方始而尚新  
便當致其丁寧之意而不使至于速壞是亦府君幕府

之意而學校諸君子所欲記之者夫治教之休明豈專在于屋室之觀哉然而簡陋不治則無以行其典禮今既完矣美矣游息于斯者揖讓升降於夫子之新庭旌德之民其庶幾乎誠不可以無記

袁州路分宜縣學明倫堂記

國朝仍改至元之二年歲在丙子六月前進士豫章徐邦憲爲分宜丞律已以奉職厲志以成事其久也有言而上之人聽之有行而下之人從之丞亦自信其可用

乃取其邑之繫于觀瞻者謀于僚友而作新之其令姓  
某以他役自任而夫子廟學之事悉以屬諸丞按縣學  
本清源書院與安仁驛之故地宋咸淳庚午令章采遷  
驛他處併書院之地爲縣學學有廟廟後爲會食堂而  
所稱講堂者在東廡之東用陰陽家言面乙之位內附  
國朝令膠東劉德以爲郡縣講堂必在廟後徹會食堂  
以作明倫堂而東面之堂不廢然取具一時地卑材劣  
不足以久學瀕水水漲而堂壞久而不可支遂除去之



以其地爲菜圃丞之始來周視慨嘆而言曰此吾之責也將誰議乎乃告邑人士以修學之意良民大家莫不驩附而旌儒鄉之士陳辰翁獨曰丞至年餘一無取于民而爲是義舉何俟于衆力請專爲之丞善而從其請陳氏出其私財使其孫德星親任其役而縣教諭吉水李辰良董之丞以公事之暇朝夕程督毋苟毋緩壘石于岸以障水取剛土雜石子築堂基高三尺拓舊基凡十尺其邑產紫杉良材也修直中度者用之撓弱斥不

不取于是爲堂廣七丈有六尺深半之棟之高二十有  
七尺工績堅緻弘敞偉然其爲堂凡三十有六柱起工  
于三年之十月堂成于明年之正月計其財用工食之  
費爲鈔萬有千餘緡丞乃使其弟邦傑與邑諸生趙良  
來求文以爲記分宜本分宜春以爲縣表之壯邑也昔  
者表守祖侯無擇之始建學盱江李泰伯記之勵其民  
以忠孝足以感發于人心儒者多誦之後百二十五年  
張侯杓作新學其兄宣公爲之記詔學者以唐虞三代

建學造士之本意而朱子記其事周程之祠則又以原  
乎道統之傳而示之以修己治人之大法兩先生之言  
非止爲袁學而言也天下後世之學者莫不誦之而知  
所以爲學者矣況乎分宜之邑去郡無百里章甫逢掖  
之士來遊來觀而得其說焉何啻耳提面命之近歸而  
修之于身講之于友施之于子弟推之于閭里豈不富  
哉其爲言矣乎若集之不敏何敢贊一辭于其間學者  
即朱子之說而學焉則宣公所謂孝弟之行始于閨門

而刑于鄉黨忠愛之實見于事君而推以澤民者吾將于分宜之邑而見其人焉則無負于邑大夫修學之意矣故書以告來者

權茶運司記

昔在世祖皇帝既一江南至元十二年江州之人即獻茶利明年收其征入中統鈔千餘錠自是天下又安列聖相繼德澤涵煦民無重擾生息日繁食用滋廣茗飲之利衣被遠邇至于今六十年而課賦之增乃至二十

八萬其設官則十七年始立江西等處權茶都轉運使  
司二平五年去權茶字兼領宣課二十八年復權茶名  
官所統出茶之地則江西湖廣河南江浙四省之所部  
而其治在江州分布提舉官其遠者分司以益之臨按  
之司有助無撓郡縣奉行信約惟謹其委任可謂專且  
重矣天歷詔書省運司而以其事分屬列郡歲侵民困  
採造懋遷觀望疑沮微斂失節公私交病守令不勝其  
責具言復立運司爲便朝廷遣使周詢不遺山谷數月

復命以爲宜從所言元統二年復設運司于江州總治之規率如故事而用人益慎重矣于是以托克托穆爾與薛公某爲之使萬嘉納爲同知魏君某爲之副某人爲判官或以風憲清強之舊或輟朝省侍從之貴或以操守之素或以才智之優是以皆能清心而省事奉法而循理外絕苛橫之使庭無誣訐之訟期年之間利入時足民庶之家至于官府頽首供億心絕他虞若不知有重立大府者然政治之美卓冠徃時而公署久敞弗治

出令受事弗稱宗顯文書貨幣蓋藏疏闊乃請于朝而更作焉以是年某月經始廳事府庫會秦公某自中書出守郡多所勸相而賜幣凡二千緡又至得以增置吏舍門垣以某月某日告成別賜鈔五萬緡使貸收子錢以具公膳朝廷所以示廉靖勤敏之報也乃爲書幣命其史謝秀實至臨川山中屬予記之乃爲之言曰夫有土有民出財用以供公上固其分也而東南民力竭矣今法制之講已詳盡而無失賦入之數已成定而無餘

若數君子之安行無事如期而集所以保息吾民以厚  
國家生財之根本豈不深遠矣乎彼以聚斂培克爲能  
者作威煽毒黷貨殖私上爲國家斂怨蓄逮其身而不  
悔亦獨何心也哉敢重言之以告來者使視夫楛則有  
所警發云

龍興路重建滕王閣記

國朝分建行中書省其鎮乎西江者即龍興而治焉郡  
城之上有曰滕王閣者俯臨章江面直西山之勝自唐



永徽至元和十五年百七十餘年之間其重修而可知者昌黎韓文公記之後五百四十九年當我朝之至元三十有一年省臣以茲郡貢賦之出隸屬東朝乃得請隆福皇太后賜錢而修之記其事者柳城姚文公也又四十年今天子即位改元元統其明年甲戌江南行臺御史大夫達實特穆爾時以丞相來鎮茲省嘗登斯閣而問焉追惟裕皇先后之遺德期有以廣聖上之孝心平章瑪哈穆特贊之曰重熙累洽之餘民力亦既紓息名

蹟弗治將無以致執事之恪恭也集衆思于僚佐請于朝而作新之既而丞相移鎮江浙丞轄以次或陞或遷平章實克始終其事焉厥既落成省府使人適臨川之野而命集記之集曰噫昔韓文公之記是閣也猶以名列三王之次爲幸今韓姚兩文公之文卓然相望于千載之上而辱俾集繼之能無弗稱之懼乎且一閣之遺見崇於今昔者如此彼滕王何其幸歟將命者曰吾相君之屬筆于子也其咨度于上下也審矣且子嘗從事

于國史今老而寓諸其境于書事爲宜宜勿辭也乃爲  
稽諸郡牘以是年十二月丙子授工庀役越明年乙亥  
仍改元至元之歲五月之吉柱立梁舉又明年丙子七  
月竣事閣之崇爲尺四十有四深如崇之度而廣倍之  
材石堅緻位置周密簷宇虛敞丹刻華麗有加于昔焉  
會其費爲中統鈔十六萬五千餘緡因前至元故事給  
自內帑用之有制民不知勞赫然足以成大藩之盛觀  
焉嗚呼洪惟聖天子躬修孝理成化于天下登庸宅揆

之臣承之以慶賞刑威之制風紀之司振肅中外自方伯連率至于郡縣奉行教令罔敢踰越其規模宏遠漸被所及無有不至者矣顧茲江湖嶺嶠之交至於海島邈在南服勢若遼遠然而涵煦之久保障之固生齒數千萬日滋以庶無外事以奪農時舟車必通無所底滯俛然咸知畏法而安分以服力于公上況乎禮義文物尚有可觀于其間者乎于斯時也來莅是藩者及歲時之閑暇而與往來之公卿大夫觀風之使四方之賓客

若屬吏之來受事者相與登臨覽觀于斯閣優游雍容以歌頌國家之盛而發揮其尊主庇民之心不亦偉乎

羊角洞天記

洞天之說蓋出于神仙家所傳記多名山異嶺曼絕人世高明空洞故以天名之而撫州譙樓前左有一卷石長三四尺許人謂之羊角洞天不見其空洞可名天者世俗相傳有人自青城來扣石暫開得入見洞府云所謂羊角者蓋郡城形勢南來東行而轉乎西昂然若首

有石上出進而不遂所以有角之名乎故宋紹興中守  
王侯秬覆以小亭後久之守林侯某掘地而觀之未數  
尺大風起穴中懼而止景定癸亥守家侯坤翁更新其  
亭而爲之記後八十五年皇元仍改至元之三年也監  
郡中順大夫塔布台侯謀于同官僚佐作新亭于其上  
既成使來求記夫府治之所在非若荒閑寂寞之濱而  
有林壑之美神明之交也自守將以下有民社之寄貢  
賦之事治教之托獄訟征繇營繕力役之繁承藩府司

臬之莅治接賓客軍旅之往來一州千里之事日不暇  
給又安有仙人道士逍遙徜徉于無爲者乎侯之爲此  
豈非因其超世之嘉名將以滌煩渴于休暇之餘得幽  
探于跬步之近與其僚友出門而觀之行庭而撫之以  
自託于高明之臨清靜之極者乎蓋茲邑之地壤土平  
衍無甚瘠甚沃之弊故其民安于勞而敏事水之東出  
者易盈易涸阻爲陂塘以備旱舟載之濟往多而來寡  
無十百之利大賈不至備物致用苟不苦窳故無過於

侈靡之傷焉方其盛時絃誦之聲無間于井社衣冠文  
物之家聯絡相望退讓謙抑習而成風出而仕者多絲  
文史國家以經術設科取士屢有其人況有大儒縉紳  
先生以古道正學作興斯文朝廷尚之四方從之其所  
溉被朔南遠邇莫之或先是以其民知愛人而易使矣  
間或質之不美弗率教令至于輕失其天常亦豈自容  
于羣良衆善之間哉然而數十年之間爲吏者有不暇  
于爲治豈斯民之罪哉仁甫親見其先人治郡之善歷



官至此故能深知民隱操守如冰雪識事如著燭憂民  
事如家事待同僚如手足理煩劇如處平易也熙洽之  
世年屢告豐吏民相安于無事豈徒任于此者得以優  
游閒暇超然埃壒之表而吾百萬之民樂至治而安其  
天年不異于無懷葛天之鄉者是即洞天而已矣蓋不  
必指羊角之一石而言之也噫結繩之俗徼三王之迹  
熄有志于治者庶幾黃老之緒餘以息民于水火不勝  
幸矣豈若方今天下沐浴聖化若是其盛吾安得不慨

然于洞天之說乎

青雲亭記

古之大夫君子所以有登臨覽觀之樂者蓋以其升高能賦山川能說非徒爲燕游以暇逸也鄭裨諶之善謀也於野則獲于邑則否是猶有所滯焉若夫能賦能說之事近不遵乎喧雜遠有得于虛曠發謀出慮孰有彼此之間哉臨川之城有五峰焉山形自南而來其第一峰最高有亭曰青雲自昔守臣與其僚佐賓客休暇之

次則必游目騁懷于其上或記或咏者多矣而辭多不  
傳國朝仍改至元之三年監郡中順大夫塔布台侯出  
俸金帥僚屬與凡好事有力者更新之以予昔嘗得一  
至于斯亭也故求文以爲記按郡城之中地高而可覽  
觀可名者三若五峰之堂則在郡治吏舍環屬屏樹翳  
塞不足以周眺望擬峴之臺可以遠眺望矣而負託城  
壁出于人爲于竒勝未足焉隱然高據總會遠邇若挈  
裘而得其領焉者莫斯亭若也吾之有人民社稷之寄

者從容治下而來至于斯也凡其目力之所及皆其心思之所至也倬彼雲漢昭回于天北瞻闕廷如日斯近凡所以竭力以事其上者罔敢不盡其心焉俯而視之罔阜之起伏闐闐之生聚休養保息寧有所未盡者乎愁嘆憂苦寧有所未拯者乎出令行事寧有所未盡善者乎環而觀之名山靈阜鬱乎蒼蒼能出神明以去菑害者吾理之得其道乎流水之行可以治溝洫而備水旱通舟楫以足貨殖田疇之廣袤阡陌之羅絡因荒易

以察其勤怠時生成以驗其豐凶者吾之賦稅力役之  
征有以公其勸懲者乎見之則必有所思思之則必有  
所處之道矣然則仕於斯邦而來斯亭者休休焉俯仰  
無愧於吾民然後得遂一日之樂者不亦難乎安得不  
爲之書以待來者

袁州路儒學新建尊經閣記

宜春之爲郡在江右上游山川完固神氣休明民生其  
間務本而力穡志定而用約商賈利欲之誘少都會繁

影之習微尊吏畏法奉命受役斂焉自保政用不煩昔  
韓文公以文學爲治其民不忘至今尸而祝之迨夫故  
宋盱江李氏之作學記有以極世變之故而風厲之及  
張宣公記新學朱文公記三賢祠大有以教其人其君子有  
以成其德其庶民有以從其化休休乎其無斁也然而  
世之相去漸已遠矣我國朝以來慎擇牧守豈弟之譽  
相聞前太守真定張侯宗顏在郡時嚴君仲毅來長其  
幕作而言曰國家思澤至厚也府公甚賢也吾民甚易

治也然而鬼神禍福之說勝而閭里之趨向易譌豈非  
學校之不修而教之無其素也乎仲毅職在文史何足  
以知斯文之事哉然志之所能力之所及作新吾民之  
觀瞻以定其心志則不敢不勉焉乃躬督學賦之入無  
敢逋遺時其師弟子執事者廩稍之給而節其浮冗期  
年而得錢若干將大作學宮之事今太守廣信張侯熙  
祖以成廟宿衛之舊連守名郡以寬厚治辦聞其來茲  
也守居簡靖民以寧壹監郡通守別駕幕府各思其職

咸無間言事有宜爲順而不撓學校侯職也而所以屬諸仲毅者益得盡其心焉乃購巨材于故家取良斲于遺庾作尊經之閣于講堂之北若干步崇基八尺深四十尺廣五十尺楹之崇如深之數形勢規模之大丹雘塗墜稱焉東南學校建立之盛莫或加矣爲兩廡以屬諸講堂之左右作櫺星門于廟門之南餘屋之適用者以次而就自一木一石一工一役傭估之直親給以時不及吏手如治家事畫諾之暇日必至焉略無風雨之



間以其蒞任之嚴明施諸斯文之崇重是以用約而利  
周敏成而固久足以流美于方來也舊有夫子燕居像  
奉而置諸閣移李氏學記石刻置堂中經始于仍改至  
元之五年歲在己卯四月至八月落成予以過客得從  
而觀覽焉郡長史以下授簡俾爲之記集乃爲之言曰  
美哉尊經之名閣也人之于天天下之于君一家之于  
親盖有恒尊矣上古民淳于其所尊無所違風氣既開  
帝王迭作已不能無不親不遜之憂孔子出羣聖之後

當時變之極生乎其世者不知君臣父子之分之不可  
紊也是以有憂焉而述作興矣因其行事之失而正之  
以復禮之常使萬世之下因其典籍之所存以行乎治  
化然則天下萬世之于聖人也書之于經也所由以知  
尊其所恒尊者也奈何後世之學者誦習文義以爲工  
不真知其可尊之故異端高遠以爲勝而謬于其所尊  
之實其憂可勝道哉是學也有諸君子之記言在來游  
來觀于斯閣者必有能尊其所當尊者矣豈徒爲瑰奇

詭異之觀而已乎

新昌州重修儒學宣聖廟記

新昌州之士有居京師者曰前縣尹張公質夫以其州人諸生之書來告曰吾州瑞之屬邑也建學自宋慶歷始縣令以時葺之其名因事而見者寧麟陳才曾淵子也有石刻記焉故諫官謝公諤之文也江南內附之初鄰境寇起遂以湮廢至元三十年瑞州守臣始命縣尉蘇澤作新學建大成殿殿有廡中象夫子而奉之配享

從祀者位設如常制殿之門爲重屋講誦之堂曰仰高堂祠鄉先賢于別室自漢梅福以下凡二十餘人元貞元年縣陞爲州廟學如故泰定乙丑前守夏侯質孫以詔書增設從祀九儒象龔廟前池架梁以達于外門至順辛未今守趙侯居仁始來謁廟顧瞻屋宇庳陋湫隘嘆曰吾州亦子男之邦矣歲時有事于夫子尊俎籩豆有序鐘磬琴瑟在列而周旋升降揖拜跪起殆不容接武于戶庭之間則何以奉揚文治以淑吾邦人乎眠諸

學廩歲爲粟千石曰是固可以有爲也乃節冗費寃宿弊以圖新之易旁近民間地以廣其宮而後衡縮端直凡八十丈屋之高廣視舊各加五尺增兩廡各十一間又崇大其列戟之門堦城唐甃廉鎮高固一與殿稱而規制與瑞州之學侔矣取材賦役皆有其方凡民與儒家者無所勞費以三年五月告成謂邦侯之功不可忘而歲月不可無紀也子之先君參政雍公嘗分教于瑞州新昌之士固嘗承乎下風矣願子有述焉質夫又曰

昔吾州之士彬彬然以文學進用至于卿大夫者代有人焉聖元以進士取人材于天下凡六科矣而吾州之廟學始大以新繼自今吾鄉之父兄昆弟來至于斯也瞻夫子之德容而有所觀感依夫子之廣居以安其息游德義之士其自此興乎某乃爲之言曰古之學者于其先師則有釋奠釋菜之禮焉非廟之謂也前代之制夫子南面以其門人配而廟食于學宮我國家因而推用之日以盛大賢守令有意于民事者必先用力于廟

學謂之知本夫廟無異于學也然而道統之傳在是矣  
學于此者誦其詩讀其書習禮明樂于其間誠其道也  
不敢不俛焉以盡其力非其道也不敢雜然以妄用其  
心聖賢去之千載求之彷彿之形容以端其所嚮導焉  
所繫不已重乎且異時先儒之爲學校言者每病進取  
之文害道必欲撤而改之使得以反求爲己之實憂世  
之意深矣聖元混一區宇且五十餘年而進士之議始  
行當是時固以先儒之憂爲憂而爲之制曰詢孝弟于

所居之鄉以觀其行之力考學問于所治之經以見其道之正求才華于適用之文察舉措于論事之要求之術亦既精且詳矣果得如斯人而用之則天下寧有乏材之嘆乎然而或盡其事而不偶于有司或衰然充貢而不盡如其說得失之故非直其人之所遭然也文運世道蓋於此可驗焉故某懼夫學者無以自致于道質夫之所望于其鄉人士者蓋有在此而不在彼者乎趙侯字仲義亳社人起身江西幕府連治縣有聲今以



奉訓大夫知新州事多善政督工者學正蕭熒訓導劉  
天桂直學張志道胡謙

藍山書院記

藍山書院者弋陽張君弼之所作也弼字希契故  
宋時繇太學登咸淳戊辰進士第除福州司戶辟充教  
授仕至興化倅而宋亡歸弋陽隱居不出門生弟子從  
受業者甚衆郡邑方內附學校多廢僉提刑按察司事  
王公強起之至縣學以爲師縣人士翕然來從之乃新

作縣學江東宣慰使王公又迎至郡學以爲師以教一郡六邑之人又作郡學于是有列薦之于朝者非其志也即攝衣而歸至元十七年其門人楊應桂申益章以來學者之衆無所息游也規爲學舍以處之得地于縣之水南廣長幾八里中爲宮焉有廟堂以祀夫子兩廡翼焉有明倫堂以講學有祠以奉其鄉先生其左右齋曰稽古學易約史興詩立禮成樂祭器有藏庖湍有所前爲大門畧如郡縣學之制明年九月告成名之曰藍

山書院其後鄰縣陞爲州直隸行省割水南地以益之  
獨書院之境仍隸弋陽張君始爲山長應桂繼之即列  
爲學官行省署官來任之矣至順三年春繁昌縣尹張  
純仁來言曰昔先大父之始爲此也買田以繼師弟子  
之食與鄉人之以田來助者通計若干畝純仁與弟顯  
忠又以私田若干畝以增其不足皆買諸民田官仍徵  
其常稅弗除也書院之設五十餘年純仁等以時補葺  
不敢廢先人之志來官于是者率三年代去經始之故

將遂湮沒純仁深惟大父之爲此學也廢幾邑人士之  
有成立焉今純仁始登至治辛酉進士第大父之門人  
方回孫登泰定丁卯進士第而純仁之子熙載亦解于  
鄉則皆遺教餘澤之所出也又何敢忘乎敢請一言歸  
而刻諸石以圖不朽焉是爲記

貢院題名記

至正四年歲在甲申江西行中書省欽奉明詔興賢能  
于郡縣聚之會府拔其尤以充貢先期驛至中外文學

大夫以較藝乃八月之吉受聘而至者先後入院遵累  
舉之制而試之九月十五日得右榜九人左榜二十二  
人又以新制取次榜右生六人左生十有二人留省以  
備學官之任其與計偕者省憲官親與為燕工歌鹿鳴  
而勸之焉其禮盛矣然省憲有主試監試之官貢院有  
主文考試之目又有分任試事于簾外者皆一時知名  
之士上下內外勤勞幾月餘竣事各散還其官所未有  
題名以記之者也蓋延祐甲寅初科不及行而因循至

于今爲缺典請立石于貢院而悉題其名焉夫江省所  
統郡二十多以文物稱布衣韋帶之士修行于鄉里誦  
書史求聖賢之道稽當世之務人人欲自獻于明時其  
積累非一朝一夕之故而來應試者不下數千人遠者  
千餘里有司者不明經學之傳不足以得明經之士不  
知治道之要不足以得致治之才學術之邪正文氣之  
升降道德之所以興風俗之所以化其機蓋在是焉非  
直爲數十人之進取而已而所得之士他日有見于世

者可指名而論之其于國家治教之運豈不重哉古者諸侯薦士于天子天子試之射而使與祭焉數與祭者薦之國有慶賞先王之遺法也備書以徵文獻于將來宜在于此詩曰鳳凰鳴矣于彼高岡梧桐生矣于彼朝陽必有詠歌以報聖天子者

南康路都昌縣重修儒學記

皇朝自國都郡縣皆建學學必有廟以祀先聖先師而學所以學其學也有司奉明詔嚴祀典而屬教于校官

薄海內外莫不虔敬苟有事焉則必記其事記事者因其地而各有所述以示諷勸此南康都昌之修學所以不可無記也昔者孟子沒而道學失其傳周子起于千載之下而傳之程子而斯道大明以行聖經賢傳之旨論說傳受之備至朱子而茂有加矣而南康之爲郡也最爾湖山之間甫及百年周子朱子爲之守其化民之速入人之深豈他郡之所可及哉且都昌之爲邑俗尤淳厚黃灝彭鳳馮椅曹興宗四君子者實從朱子遊講



學之懿修行之篤傳諸其家及其鄉之人者盡宋之季年夜冠相望猶有可考者沐我皇元之治者又七十餘年矣今縣令豫章于友信以爲其曾大父嘗及朱子之門而邑教諭清江宋釗以爲一官五年懼無以自見于學校相與悉力于廟學功成之日使來求文以記之按郡志學始建于唐咸通中宋因之建炎之後更作者皆有記可考內附以來無大改作禮殿講堂取具而已其門廡諸舍責成衆力是以不能堅久其可書者惟泰

定丙寅縣令中山段完澤教諭宋守正爲垣以環宮鑄  
銅爲祭器燕器與增置水田二十七畝耳及釗與于令  
先後至以仍改至元丁丑之歲始謀修學謹簿書之出  
納粟必至庾錢必至庫民無敢隱吏無敢私根括地利  
之沒于民間者而彭氏之子孫喜學校之有興也共割  
其私田二頃以益學賦將有興作以歲歉未克二年之  
間祭祀之用師弟子之廩稍既具會其羨得三百五十  
餘石爲中統鈔六千餘貫買株杉之木于旁邑以已外

之歲七月經始自禮殿殿門及明倫之堂先賢之祠諸生講肄之舍下至庖庖凡梁棟榱桷一物之既朽一木之不堪者悉撤而更以良美之材覆宇堅密締構高壯冀可以經久焉外三門撓朽甚不稱觀美易以完植垣墉高厚周密儼然有不可踰之勢焉成以其年十一月爲記其事如此

瑞昌蔡氏義學記

九江瑞昌有作義學者其一人蔡季霖也季霖沒其子

士仁等修其屋室贍其供給延名師進宗族鄉黨而教之如其父時不敢廢來求書其事以示後來者自朱文公講學白鹿洞環匡廬之麓士君子聞風而起者多矣其在德安則有蔡元思其在瑞昌則有周舜弼與其從弟亨仲從子仿在都昌則有彭儀之皆卓然爲高第弟子而元思事文公最久辨疑問答必悟徹實踐而後已文公沒心喪三年又以事文公者事黃直卿而卒業焉其晚也與其同門之友數人每季月一集以相切磋又

如此者三十年而鄉都州閭之間父兄弟相與服行  
其化庶幾鄒魯之盛矣宋之季年郡縣學教其士子以  
科舉之業相尚識者憂之或即先儒之遺跡或因山水  
之名勝則爲精舍以處學古之士馬澹泊堅篤無利欲  
之感是朱子之學行于當世而九江南康之間如蔡周  
諸君子得以化成于其鄉也我國家始置進士舉必欲  
學者深通朱氏論語大學中庸孟子之說而五經之傳  
一有定論蓋將使其人專心竭力於此焉苟有以深躋

其味而極造其旨必幡然而悟惕然而恐思有以靜存  
動察如所問所知而用功焉則其人不爲聖賢之歸  
而足爲世用者乎惜乎或假其言以僥倖一第而遂視  
之不啻如筌蹄此不惟上負國家又負聖賢而其日暴  
月棄亦已甚矣今也緣黨庠術序之義建學延師于其  
家父子兄弟相承而無廢吾故知文公之爲教元思堯  
弼之流風遺俗猶有存者豈不盛哉

撫州臨汝書院復南湖記

臨川臨汝書院在郡城西二里許有滙澤曰南湖延廣數百畝受西北諸源之水霖雨不溢旱乾可儲其流南出多所灌溉而後郡城衆流會焉蓋屬縣樂安崇仁宜黃之水皆至于郡城之南與所謂臨水汝水俱合于盱江之水而東北行去郡城殊遠雖抑之趨近卒不可得也城郭之間峰嶺膠葛地勢迴薄自官府民居祠廟閭巷因其高下無有虛曠風氣隘互疏通委折則渠溝之流注而已矣是以無以宣其堙鬱去其壅底以來爽塏

而至清通焉則南湖之納於郡人之休養生息盖有所繫焉書院雖以臨汝名實主於茲湖也考諸舊誌容其浚而莫之敢埋者舊已故宋天聖中修唐故事郡置放生池時守臣太常博士朱公正辭用詔書即此湖爲放生之地其說曰使魚鳥草木各遂其性以祝人君千萬壽云是以有司謹治之曾子固諸人皆嘗賦焉非直道其遊觀之美而已也及乎宋晚儒士之在庠序尚進士業而務爲祿仕學道之君子有憂之是以常平使者都



昌馮公去疾卽湖爲堂率學者以從事乎爲己之學書  
堂祠朱文公而尊信服行其說焉而茲湖也遂爲風雩  
詠歸之地郡人士着艾童冠之至于斯也相觀而善是  
以徽庵程君以考亭之學來爲之師游其門而知名者  
故司徒楚國程文憲公鉅夫故翰林學士吳公澄其人  
也蓋書院始于淳祐戊申未三年而內附國朝崇尚學  
校建官立師士之斃學於斯者無敢慢焉又數十年而  
執事者弗虔浸爲旁近堙塹殖利鳶飛魚躍之高深溷

以汙萊限以畦町吏民失及時之樂士子興茅塞之嘆  
彼獨何心哉吾聞古之爲田者方里而井井九百畝上  
有阡陌下有溝洫夫豈不知干其制而不敢盡者所以  
爲天道地利之當然而不可易不然何待於後之盡利  
者之輕廢乎此又君子之所當究心者矣是以仕于斯  
者豈無慨然欲復其舊乎蓋曰力有所不及而已至正  
辛巳蜀人王君堅孫來爲照磨覽其舊跡而嘆焉語諸  
其寮以告監郡倅貳請按圖籍之舊而復之莫不稱善

是時山長張震盡力職事租入無弊廩膳有常自禮殿  
講堂門廡齋舍久壞而弗修者悉致其力而新完之土  
田之久侵于人者理而復之方委曲咨勸以承王君之  
志而幕老毫人趙君雷澤實來克合其志按得其實即  
備徒役具畚鍤除損壞完隄防沛然而清流集淵然而  
止水停生植爲之光輝飛動爲之欣悅而郡將處州萬  
戶邢侯惟明始作漱石之亭以爲之勸而放生風雩枕  
流皆如其舊自始役至于成功朝夕程督者錄事司達

魯花赤和尚與震也既而太守洛陽楊公益始下車登斯堂也觀斯湖也顧而喜曰天将使吾民沐浴聖化而蘇息其凋瘵乎春水方新秋潦既盡予得以與文武吏士酌芳泉以胥慶詠太平于無涯有不在于斯者乎郡幕三君皆歷任憲府而至是以得時措之宜者以予既老而僑于斯土也命震率其訓導虞登而以其府公之命來求爲記云

寫韻軒記

龍興紫極宮寫韻軒高據城表面西山之勝俯瞰長江  
間乎民居官舍之中特爲曼絕眺望于此者亦或有之  
至于秋高氣清望見上游諸郡之山若臨江之玉筍撫  
之華盖寸碧天際森列戶牖此則他處之所莫及也西  
山神仙窟宅得道者往來城府致其憫世拯俗之意而  
游覽燕息于此蓋必有之郡人相傳唐文簫吳綵鸞二  
仙豈其人歟世傳吳仙嘗寫韻于此軒以之得名予昔  
在圖書之府及好事之家往往有其所寫唐韻凡見三

四本皆硬黃書之紙素芳潔界畫精整結字遒麗神氣  
清明豈凡俗之所可能者哉要皆人間之奇玩也登斯  
軒而思其風采亦足以寄遐思也乎而世人塵俗之想  
沈溺於胸中意謂高仙幽棲者不異于已而書其遇合  
之事殊不經也蓋唐之才人於經藝道學有見者少徒  
知爲文辭閒暇無所用心輒想像幽怪遇合才情恍惚  
之事作爲詩章答問之意附會以爲說蓋簪之次各出  
行卷以相娛玩非必真有是事謂之傳奇元稹白居易

猶或爲之而況他乎遂相傳信雖爲其道者若文吳之事亦久而莫之察良可悲夫蓋所謂仙者形質化泯神明照融豈復有分毫世俗之念而有可以受謫者乎昔陶隱居著真誥載李夫人少女降楊生之事猶言元契遇合真道不邪示有偶對之名初無樊穢之迹從容接對禮意森嚴此一證也借曰以凡念之起見謫于天自當恐懼修省一息不敢緩而可以因循衽席之燕暇以至十年之久乎誣英君也亦已甚矣而使庸人孺子無

所知識更得以藉口吾黨之士其可吮墨弄翰揚瀾而助之波乎因書此以遺其觀之主者

靈惠冲虚通妙真君王侍宸記

至順三年夏樂安縣尹蒲君汝霖以書來告曰在延祐庚申汝霖同知南豐州事六月州境大旱禱諸山川弗應州人言有侍宸王君祠在神龜岡所謂妙靈觀去州數里侍宸宋徽宗時歸而沒于其鄉其神至今有靈異盍禱諸汝霖親往禱焉既得卜乞靈水于缶登舟以還



有蜿蜒浮水而來者紅光赫然雲氣隨之州吏以器迎之即就器蟠不動及州門雨垂降至公署而大作是歲稔明年又旱吏民以汝霖前禱之應也諉汝霖仍徃其應如去歲歲又稔于是州之父老來告曰侍宸之思不可不報生有道術著于時歿又惠澤及其民宜白朝廷有以表異之南豐下州也而不統于郡得專達行省乃以侍宸事爲文書上之既聞於朝事下太常博士議曰君故宋時已封沖虛通妙真人宜加賜靈惠易真人曰

真君是時有臨川道士唐樂真以法術承應內廷是年以侍宸教法禱雨京師有應集賢院亦上其事故朝廷知之而得封甚速也命既下而汝霖學製錦於樂安去南豐三百里而近增封之命至斯所以侈上賜而係民心猶汝霖之責也公在太史幸爲書其事于石汝霖以鄉人私請焉按臨川盱江志宣和間有南豐人王文卿字予道號沖和子生有異質嘗爲詩告其父有方外之志父歿辭母遠遊渡揚子江既濟行野澤中雨暝迷路

見若有燈火者就之有嫗爲逆旅者得文書數卷篝火  
讀之雨霽火絕天且明乃在大樹下無逆旅也其書蓋  
致雷電役鬼神之說云以是濟人甚衆名聞江湖間當  
是時徽宗崇尚道教嘗夢得神人以形求之得侍宸焉  
賜見大稱旨拜太素大夫凝神殿校籍其官道君別置  
道教官也大夫校籍位已尊矣賜其父承事郎封其母  
曰宜人京城有狐爲妖人爲立狐王廟瑤津池又有妖  
蓋黑鯉也奉詔劾之狐鯉皆雷擊死將有事於明堂而

雨不止君禱之立霽有詔獎諭拜金門羽客自校籍升侍宸賜號沖虛通妙先生淮南北以無雪告上憂麥以告侍宸遂大雪麥熟賜金帛不受盜起山東徒黨號巨萬郡縣不能制聲勢張甚召見便殿上以爲言對曰當以神力助討他日獻捷者言天大雷雹賊乃潰而道君遂歸功于侍宸矣而侍宸實預知天數數數以修政鍊兵爲請不暇聽其說乞身歸田里去求不得一日拂袖徑還南豐未幾宋南渡紹興二十三年八月二十三日

爲酒食名鄉里飲別書頌儵然而逝既殮舉棺而葬之甚輕蓋尸解云神龜固其墓也其靈異之事相傳不絕侍宸歿而能福其鄉之民蒲君去他官不忘其舊民嘗受侍宸之賜其仁惠皆可錄故書之使邦人有所考焉

白鹿洞書院新田記

南康白鹿洞書院山長柴實翁誦其郡守崔侯之言曰昔者斯洞在南唐時學者之盛猶至數百人宋初固不待言矣及朱文公作而興之以講道其間其規約之要

被乎天下學者嚮往以爲宗焉此其所建立又非昔人所能者翼之不敏假守茲郡誠不敢以學校爲緩于聖人之道誠亦知所尊信而未之能學也思致其所以爲教者而未之能爲也然而瞻其既稟使其師弟子得安于治其業顧力雖不足猶庶幾可能乎乃視學田之入而節縮其冗泛計其貲之積可易民田百畝實翁之未至也教授王君肖翁實通攝書院之事乃能親行曰視其肥磽去取之故所得皆上壤夫侯之意王君之

勞田之始入皆不可無記願刻其事于石嗚呼朱子之書學者蓋家藏而人誦之矣其於聖賢之傳爲學之要本末始終毫分縷析無復餘蘊使窮鄉下邑獨學特行之士苟能玩而習之思而得之體而踐之及其久也猶可以入聖賢之域況乎有明師良友相先後之討論問辨以求其正觀感契會以推致其極者乎此其人固何待于人之食之而後用也雖然侯郡守也書院郡之學也自侯爲之者當如是耳來者其勿負侯之心也侯名

翼之字鵬舉燕山人歷官多美政守是郡也三年矣通  
練樂易敏勤堅信民無隱情庭無留事其用民力也若  
增石閘繕郡治非必當爲者不爲也是以事集而人不  
知擾王君金華人其大父師勉齋黃氏柴君鄱陽人其  
父師雙峰饒氏皆不忘其世學故併書之

瑞州新修仁濟橋記

柳貫

瑞州治高安其南西壑谷諸流匯爲錦江橫貫州東下  
注章水州之郭郭如環玦中分而廛閭衢巷夾其兩涯



民旅族居而錯行者恃橋爲命橋一日不葺則徒輿斂  
迹公私亦瘡雖官調水夫刺小舟待濟墮一羽於深淵  
若將委之因涉者之思利而知夫郡政之大莫先於橋  
功矣昔橋未建聯艦繫竿直州治爲浮梁隨波升降然  
僅僅以歲月計成毀宋淳祐壬子樞密院編修官鄭公  
守郡始相方宜橋鑿巖架虛既成九年而一毀毀十有  
一年守董公嗣成之成三年再毀逮至大己酉總管蒲  
公作鎮時閱歲三十六而橋役大興役大故功鉅衆方

期之以久會泰定三年五月癸丑雨水暴至勢怒衝衝  
決明日壞北隄橋岌岌不能支又明日雨止頽缺參伍  
之一而絕岸奔流浩渺數十尺行者躑躅居者顧慮從  
自畫馬莫司莫續其年十月中大夫太原傅公適以麾  
節涖郡進父老庭中曰吏役于民我謂郡政爾謂民庸  
有先于橋功者乎衆謝曰吾所欲也而未敢以累公于是  
長貳謀協寮案式從封內之人輸財薦力如趨父任公  
復求得嘗承蒲公橋事而幹敏有操畧者李榮等七人

使主其出納命郡錄事陳德敬總其凡以屬役賦功自  
經始至成公日來勸相工忘其勞不勵咸飭諭曰吾窮  
釁隙窟室而根治之不遺後憂利勝計哉蓋北隄當水  
衝舊中實土囊外傳以石水朝夕灌漱客土銷址則無  
恃今索石增厚至十數重執度揆之其袤七十五尺其  
廣一百二十四尺上覆屋爲楹間七以補廢還故又謂  
南墩東西削方水與石鬪石不勝則反手磔裂宜易博  
爲銳逆水入之以殺其悍諸梁木之弱且撓者甃石之

破且泐者咸除撤繕理擇于堅密不苟不媮厥既僦功  
列樹兩柵分爲三達節東西行者不得方軌並駕以撼  
震致害所爲長慮遠引無贖算矣書來請記其迹予嘗  
忝公同朝不得辭則復于公曰目睫之患易見水潦之  
害易知而隱于不矚沒于未形限于不自達爲難悉也  
今公發政之初不迂橋事以興是役所以自任乎父母  
師帥之重而求盡其心者可槩見于茲四封匪異千里  
惟同顧吾之職得以施置開塞有大于一橋者乎公患

不聞聞斯行之矣然則諉橋功于細德豈誠知公哉橋  
舊即江以名而今榜仁濟云

玉隆萬壽宮興修記

郭景純與許旌陽同時嘗爲旌陽相宅得豫章西山之  
陽曰逍遙山者居焉後于其地拔宅升真即建游帷觀  
改玉隆萬壽宮游帷者昔旌陽上升時嘗飄墮錦帷其  
處名之即以其實也玉隆者度人經三十二天號有太  
釋玉隆騰勝天謂是宮爲羣帝所館安知玉隆騰勝不

在茲乎實之欲以其名也觀肇興于晉而盛于唐尤莫  
盛于宋宋祀將四百而是宮之營繕見於紀載者二大  
中祥符之締構其力出於郡人光祿寺丞胡公仲容而  
王冀公寔記之政和丙申之恢拓其費出于係省之官  
錢其圖準西京崇福之舊制于是內出玉冊遣帥臣加  
上尊號又詔侍從升朝官爲提舉宮事其祠秩之次浸  
比隆于岳鎮矣然則祀隆而官盛非以昭應之受書玉  
清之定鼎實會乎其時哉至元丙子宋社既屋有司上

江南名山仙迹之宜祠者于禮部玉隆與居其一故凡  
主是宮率被受壘書如令至治元年臨川朱君思本實  
嗣居其席始至見十一大曜十一真君殿祖師堂摧剝  
弗治位置非據謀將改爲則以狀請于教主嗣漢天師  
會元教大宗師吳公亦以香幣來祠因各捐貲倡首而  
施者稍集椽材庀工有其具矣蓋宮制二殿中峙廂序  
參列于前而分畫其中以左右拱翼迺相藏室之北撤  
故構新作別殿六楹東以奉十一曜真形之像西以奉

吳黃十一真君之像夾輔面背各有攸尊亦既無紊于禮又即十一真殿舊址築重屋一區上爲青元閣下爲祠凡自唐以來嘗有所施與嘗主興造之官寮以及歷代住持同袍士庶之有功有績者皆列主而祠每三七日集衆焚誦歲時潔羞薦饗視子孫妥侑之意無弗逮焉經始于泰定二年之八月閱三年而考其成朱君過余請記自始有宮迨今何啻千年營繕之功不一而獨祥符政和得傳以其有記故也然則朱君之爲是役績



用章灼如是欲不記得乎朱君字本初受道于龍虎山中而從張仁靖真人扈直兩京最久學有源委嘗著輿地圖二卷刊石于上清之三華院云

吉安興學記

劉詵

今天子在昨務欲以教化作新斯民詔書每下必首及擇守令勉學校甚盛意也至正三年秋燕山高侯志自懷慶移守廬陵既下車祇承德命以學校爲先務凡所以育材成化者朝夕究心焉先是廬陵後學多事章句

記誦之習或經旨未明躬行未粹者有之公進而誨之  
曰爲學之道讀書明義理修身積實踐以爲正人君子  
之歸若但飾文華徼利達非聖賢意也乃與職訓者講  
論爲學之次第使八歲入小學十五入大學者皆卓然  
爲古人之規程繇是士洗濯琢磨始彬彬然知慕三代  
之風他日又進其老宿而謂之曰朝廷養貧寒老病之  
士亦謂其有道有學耳若但以其年無擇于市井執技  
有過不爲士所齒者豈上意哉繇是士稍稍自引退而

老宿無不知廉恥者先是廟學禮儀苟簡典禮者不取于生員別設禮生禮生專引贊進退而不知學生負專講貫誦習而不知禮公曰本末一貫奈何舉體遺用哉草禮生而生員無不閑于禮者先是府史小吏多不務學公進而謂之曰汝曹能知學始可大用今惟事刀筆苟薄利特民之蠹也使之朔望聽講與諸生相問難選其才者以次升縣州府吏繇是六曹兩廡絃誦相聞吏始知進爲士不以吏自限先是廟學錢糧雖多府曹專

役任錢糧之科州縣則吏胥移易侵貸上下表裏爲弊  
歲不給用公革府曹專任者責舊逋嚴新徵而倉廩以  
實講堂舊扁振文公復取三代立學大義增揭明倫二  
字其前作宮牆修杏壇新儀門立課習飲膳定規著于  
石使後之典教化者恪有所守繇是深山窮谷之士多  
莪纓鼓篋而來若徐滕淮揚江浙廣海暨色目公卿之  
子弟爲負積百二十有奇至正四年應鄉試者五十有  
奇君子謂廬陵學者道德明秀之盛自宋慶歷歐陽公

作記以來殆未始過此若漢唐則必無也夫所謂興學棟宇之高明戶庭之夷厥其小者也人人以儒自飾以士君子自勉其大者也博聞強記締章繪句下筆如春濤瑞錦學之末也少者日勉于孝弟禮節長者日修乎仁義忠信以進乎修己治人之方則學之本也公之興學不徒事其小末而務其大本非知道者未易與言也公之爲政能使詞訟之繁劇者簡賦役之偏負者平盜賊之充斥者息逋民四歸桑麻被野搯饑則講常平請

賑糴盡其職救火請雨竭已力不憚勞捐已俸不吝費  
施于民勤矣然皆推其平日所講者行之學校善政之  
本也傳曰君子學道則愛人非歟公事母至孝視古人  
可不媿非公所講於學之本與于是教授李柱與多士  
謀書公之美俾誦述其辭焉

螺川重修馬驛記

成周之制凡國埜之道有廬室候館以爲朝聘往來之  
宿食其後爲置郵爲亭傳爲驛遞所繇來尚矣至國朝

尤以是爲重蓋使九州四海之廣大窮邊輔邑之遠近  
文書期會絡繹周流如人之血脉貫通于一身誠有國  
者之要務也吉安螺川驛實當江廣之正途驛騎之要  
會而館宇歲久摧撓圯漏其黜陟者漫漶而不鮮其贊  
覽者沮洳而不治監郡愔都刺嘉議視篆之數月始命  
葺而新之內則廳事完美堂房邃嚴櫺牖虛明軒溝靚  
瑩使處者可游可息無周單子客不受館之歎焉外則  
廊廡洞夷重門翬翼庭道隆高馬廐通敞而又前植花

竹環以欄楯使來者下馬周旋無鄭子產門不容車之  
誚焉蓋能上體朝廷優崇使臣之意故非惟俾庭館之  
高明雖坊墁綵繪煥然可觀則夫使者之過此者豈不  
仰而思之吾之道路之所歷一寓一息之次無不享有  
國家之美意亦將圖所以報稱乎詩曰我馬維駒六轡  
如濡載馳載驅周爰咨諏此古者使臣之用心也若夫  
邦侯之勤于其職則後之來者尚善繼之

二程先生祠堂記



聖人開天地不言之秘賢人開聖人未發之蘊是皆神化之所蓄至理之所待天之所以扶持乎三極綱維乎百代也故其人或曠世而一見或接迹而相承或出於一家比境之間或合於殊鄉異域之外非天下人心之所能預擬者也自伏羲畫八卦曠千有餘年而文王周公闡之自大禹發九疇亦曠千有餘年而箕子武王之自夫子集六經羣言之成又百有餘年孟子繼之又曠千有餘年而周子二程起於一時凡孔孟之遺言遂

大明而無蘊嗚呼是數聖賢之作時之或久或速地之  
或遠或近皆天地之數與聖賢之心默相扶于冥漠之  
表天地能啟聖賢之生聖賢能續斯道之命然天地能  
知數之所以啓聖賢不能知數之所以生是聖賢不能  
知人豈能預擬哉且文章之與理學本同一源自孟子  
未有分也漢唐以來文章盛而理學泯至宋初文章復  
大盛微周程理學亦泯矣謂周程不關天地之數不可  
也然二程之學始于周子使二程子師周子由太中公

使太中公得以使二子從周子自尉廬陵遷虔攝倅南安始謂天地若無意焉亦不可也于是宋嘉熙間廬陵江萬里來守吉遂推明二程從周子由吉先之乃創鷺洲書院祀二程及太中周子焉後十七年衡陽陳斗南來尉廬陵又推明吉之祠太中二程是矣未若廬陵尉廳祠之尤爲親切乃復建祠宇尉廳然祠隘而旋敝皇元丙子縣尉李灝復作祠祠益隘又即毀像寄他祠垢穢滋甚至正元年古魏沈褒來爲尉慨然嘆之遂白監

郡惜都刺闢地于尉廳之右構堂三間前環夸庭旁列  
齋舍高明疏敞祭有餘地誦有餘屋可謂盛矣按二程  
子實生黃之黃陂尉廨而黃州不知祀二程太守李說  
始爲祠紫陽先生以爲黃州謂則黃陂尉廨不祀太中  
可知聞其所謂思賢堂者皆委廢不治而吾廬陵祠若  
此豈非官政之善而風俗之美歟沈尉固可書也助其  
成者蕭文孫憲孫亦可書矣

惠政橋記

姚雲

惠政門當新昌西郭山溪介之故爲舟梁以門名暴澗  
潦起溪別市斷涉有溺者寶慶乙酉邑令趙公綸初作  
石址後三年李公從丘里之號更曰太和橋蓋三十有  
一年會蛟孽壞又六年鄉老姚君汝輔請于官釀成之  
越十有五載燬于劫火遺址巍然行者未嘗不出涕也  
議復者衆矣何以不克成至是邑主掾羅思敬以義導  
施厥民用勸一志興事橋卒以成縱三百七十尺有奇  
什九分之其一爲衡上覆以屋爲楹百有十六跂翼聯

絡藻繪煥爛凡致材萬三千靡粟三千斛幣金以萬計者二百六十而贏勺受銖算官不知役始辛巳迄己卯亘五年而後備迺扁揭復名惠政輿馬利往廛市課讜相率謁記于高安姚雲我聞太皞窺木絕港堯樹橋木西伯造梁箋者謂自天子至士有常等民不得爲之帝王共德也鄭大夫濟人于溱洧君子曰惠不知政蓋謂乘輿之濟不如濟以政之博或深求于輿梁徒枉之外則濟人者非政與他日嬴負鉅力役石傳海其民毒焉

夫豈知佚道之使民速于郵乎哉

泰和州鄉貢進士題名記

劉崧

國家增損前代之制以科舉取士至嚴肅也天下歲貢于內省者凡三百人各省有定額而州郡無定名示至公也江西歲貢止二十二人郡之隸于江西者十有一而吉安爲上郡州之隸于郡者十有四泰和其一也泰和舊爲縣衣冠絃歌之俗十室而九在宋初咸平迄宋季咸淳具有記進士題名者逮我元乃未有錄焉非缺

歟粵自延祐甲寅科興至至正丙申通十有四科垂五十年由楊景行至某得十人焉或第或否或甲或乙或續或絕其姓氏年月咸可考也其始下第于春官者止許再試其或授正長以歸者恩例也其後下第者通得爲正長而鄉試復取額外優等爲諭錄者則又至正癸未之新格也科凡八舉而中廢又歷五年而更興興而益振而泰和具有人焉豈非盛哉某以晚學實忝斯舉顧題名之有序豈陋劣之敢辭謹考摭次第而諗于衆



曰惟士之所以學于家舉于鄉而貢于天子之廷者若  
是其艱且重也將不曰經明行修已乎往者蔚乎其有  
立矣來者庶源源而有繼乎故題名所以識其人也識  
其人所以重觀考也識而刻諸石示久遠也記進士而  
獨詳于吾州者爲泰和作也

遊廬山記

李 洄

延祐己卯二月九日予還自江右過門人萬子方于潯  
陽別數年一旦出不意相得懽甚遂同遊匡廬北出郭

日已銜山明霞森射勃苑天際行未十里道旁水聲悲  
鳴惝恍人意騎稍相後先輒失言緒崇岡列岫漸旋辟  
馳向以就來者抵暮經一小山迴谿生雲疊巘蒙翳路  
轉欲冥半巖有大樹高十丈餘白花紛敷照映溪谷  
口叢薄間茅屋一區寂無人聲約更初至聖治太平宮  
宿聽雨軒隣房亦有客方寢乃前巴陵守易平樊炳子  
明回將窮深極討咸又喜以爲得侶明日過匡山精舍  
臨磬湖披輿草求玉蟾丹井入飛雲洞訪隱者桂心淵

不遇遂肩輿過東林寺方行林隙中白雲徐舒青峰遞  
明心忽不定久之因憩三笑亭由三笑虎溪蓮社蘇白  
堂遂升上方望靈運講經臺慨然前人高風上方出東  
林後單山崛起與匡阜對阜若大屏居前其上繙經臺  
明日出西林登天池山望絕頂路險甚捫歷窮澗矯首  
千巖瞰逼微嵐下視林壑橫潰凝立待定四顧生怯青  
蘿歲絀咫尺無路幽鳥飛鳴山應逾遠有石突出霄漢  
間其畧若巨艦乘瞿塘縣流急開峽口問之鐵船峰云

如是緣石磴以上餘二十里至天池坐文殊閣下視萬  
景杪甚毫髮江流匯漚杯帶泓明羣山起伏掩仰微浪  
挹漢王峰徙倚白雲亭觀宋將岳飛詩謂其當朝廷多  
事猶能抵隙而爲是遊得支逕上大林僧慧遠始居樂  
天濂溪所嘗遊出緣絕壁下入佛手巖廣不能數楹下  
蹙無地曠覽悠邈視天池雄麗過之側出微徑愈進而  
愈邃崖間鐫大隸書曰竹林寺苔蘚綴絡隱顯翠壁前  
控飛崖如几筵延袤丈餘三面皆斗絕從旁一松偃蓋

下覆方卧屋上月在松杪其下即錦繡谷謂春時谷中  
花開猶錦繡也故云又謂每風雨間鐘磬梵唄寺蓋隱  
其中云是晚下宿福海寺明日到圓通飲三蘇堂又明  
日導者失路遂踰匡王觀谷簾泉淵明栗里抵靈湯由  
是蓋轉而之山南矣乃從報先寺杏壇間遙望白雲紫  
霄諸峰森猶紫筍矗其巔耶舍塏冠簪玉如憩歸宗寺  
觀晉王右軍羲之墨池鵞池酌鸞溪一滴泉夜宿陸修  
靜簡寂觀所當軒白雲川中登石壇瞻魁斗徜徉雙瀑

間早書所當軒白雲川而去至開先寺其東馬尾泉其  
西飛玉泉萬竹亭漱玉亭青玉峽峻宇天闢兩岸嵐翠  
欲滴其地如大甕泓渟爲潭潭中有巨石水從中來觸  
石分二道以出狀若白龍飛墜潭中盤旋數四循石阪  
下其巔委勢遠益緩始逡巡斂怒趨去登雲錦閣西軒  
望瀑布其旁香爐雙劍二峰尤秀麗特甚云上有三石  
梁橫絕青冥窅不見底苔滑不可度度輒得遇異人瀑  
行青壁間如長虹委蛇下沈邃淵須臾大風暴起泉不

得行從旁掣曳欲斷還續忽飛旋重輪直入空際迴風  
一散萬象冥蒙或文綃霞縠陟降天際偶隨颺車奄爾  
而逝瞬息萬狀殆不可窮急雨繼之四山霧晦銀竹森  
豎形神開悟自以茲遊冠絕平生即相與命酒頽然就  
醉以卧明日越羅漢閣東行五老峰下五老頷頤隆肩  
欲欬以嗽者蒼然負幃薄以立覲其或與我語笑顧久  
之度松關入棲賢以三峽陸羽泉玉淵潭之竒因遂留  
宿焉次早見硃砂峰于雲屏閣僧謂棲賢李渤楞伽李

公擇讀書處其南有洗馬碕由白鶴觀以往亦李渤讀書處今爲紫陽朱先生晦菴白鹿洞書院其梁于澗曰貫道之橋其澗之隈曰勘書之臺又有曰風泉雲壑曰聖澤之泉致祀殿庭下拜先生遺像于祠顧瞻磅礴思古之人得以遂其所致于茲山泉消其塵昏息其道氣終以大有所爲天下者未必不少有助云隨至尋真觀女道士蔣尋真于此仙去祠故在焉乃攜衾裯躋山巔觀所謂三疊泉方二三里抵缺冰壑已無路稍進皆鳥道



嶄削屹不得前上摩蒼冥下俯幽壑仰見一峰戴巨磐  
石直立雲表攀緣側足如是歷九竒峰謂之九疊雲屏  
而泉出其後山窮絕處也樵豎見止謂遊者徃徃觸風  
雨雲霧類不得見而返及至天宇澄霽向之磐石如出  
井底四圍巒障欲合泉若瓊簾從空懸布爲三疊而下  
透映蒼寒飛淙濺霧灑面蒙密遽然以醒謂天地窮而  
萬物亦窮也或又云方冬泉脈尚微其行觸坎壘必鼓  
轉久之始下狀又若素絲千仞洞貫三大雪毬于空中

微陽抱景煥爛輝發蓋谷簾泉瀑布三峽橋青玉峽爲  
山南北之冠而雲屏三疊泉又清玉峽瀑布谷簾之冠  
也山至邃境至清勢不得留月中捫蘿下宿于尋真明  
日經李騰空昭德觀吳障山寶巖寺祀周元公墓而歸  
是夕大風雨李洄漑之記

龍溪橋記

劉岳申

古之爲梁者二輿梁曰梁造舟爲梁亦曰梁皆橋也古  
者出于有司本先王爲政之一事後世出于民亦有司

所屬也近年稍出于學佛之徒而有司不與其事然其  
取于民一也特愚者不悟耳良由王者之政熄儒者之  
道廢有司者其權逸于吏縱吏爲奸市以漁其民徃徃  
事未集而怨已興佛之徒始乘其弊鼓其師之說以誘  
吾民而富人大商下至小夫寡人無不甘心聽命焉有  
司者懼政之不修爲已累也不自責已愈益疾視其民  
且以詬儒曰儒者安所辦此吁其不知爲政甚矣永新  
去州五十里有水曰龍溪東會永新達于吉安西距茶

陵五十里實江西湖南之要會自宋端平甲午議衆建石橋而落落不合于今垂百年矣民之病涉未有甚于此者也當宋季以官若民之力何不可爲而獨難于此宋亡五十年以官用民之力愈易于前而猶以其難遺今日何也蓋嘗疑之其時其人必有所待式克至于今而後遇龍溪賀君豈偶然哉賀君不煩有司之令不假衆人之力以其私財奉其母楊夫人之命其子景賢景文成其志起泰定丙寅三月迄明年十月長三百六十

尺高十八尺廣不及高二尺凡爲墩者六貼石爲兩岸  
高與墩齊合爲墩者八架以大木百圍覆以華屋百楹  
倚之以曲檻履之以堅石鈔以緡計者一十五萬有奇  
米以石計者一千五百有奇百里之內百里之外民不  
知有役而坐見此橋江西湖南官民商旅之往來不聞  
有是役而坐乘此橋一橋之費不足爲賀君道一橋之  
功不足爲賀君贊獨使先王之政儒者之道復見于今  
而異教不得爭長稱雄其間豈非百年間一偉事歟君

子曰賀君有濟川之才而無用世之志者也使有一日  
民社之責其惠利及于人人者豈止此哉充是心所謂  
思天下之民有溺者由已溺之可也雖欲使人不樂道  
其善得乎夫非余言也衆人之言也衆求余記故不辭  
君名士貴字性翁最樂爲善尤輕財嘗歲饑捐私租數  
萬石與耕者其鄉人云

上猶縣治記

黃文傑

延祐甲寅之秋縣尹汴梁巴延徹爾泣猶川首諏風土

與沿革之由僉曰猶之疆域東界南康大回嶺南界南  
康廬狗嶺西界湖南青嶺北界龍泉白雲嶺谿峒廣袤  
邑落其中民以山深而俗淳亦以山深而穴寇唐天祐  
乙丑猶人盧光稠知虔州黃廷玉以擢科補使院議創  
猶塲辛未黎求代光稠俾判官李照割南康西南地置  
上猶塲推吳知道黃廷玉勾當塲事創塲治于今靈巖  
寺北時奸盜蜂午廷玉保障大振軍功歷任二十四年  
前後褒詔三十二道昇元庚子累官銀青光祿大夫國子祭

酒猶民德其政刻于石南安志書亦復記其誥秩者誠  
欲激昂後人之善保障也至南唐保泰壬子始升塲爲  
縣居猶水之上故曰上猶自創塲迄今三百四十五年  
羣兇寇三鄉者五十有三而犯邑者十五紹興壬申鄰  
寇復亂邑令王同老謂居民何累家而聽害許自便奔  
虔于是寇平民歸雖火其廬人物如昨令喜倡民起梁  
棟于煨燼輪奐翬飛壯昔十倍其德民也遠矣已巳足  
袍峒陳葵反本路孫通判咎猶字有反文壬申改爲南



安縣紹定壬辰邑令胡泓徙邑築城其後邑令葉茂由  
監軍歸政稱郡守以李申吳知縣事丙子臘月元帥塔  
出攻猶圍城七十二日弗克退師己卯三月賈叅政復  
至諭以城降邑令李申吳誓居民李梓發之儔曰猶未  
城時遇有變民散而之吉贛今城矣正爲吾民義守具  
也前人建城後人降城義乎弗許至十五日城陷屠焉  
邑解舍倉庫及一千四百一十六家之生靈玉石俱焚  
縱有苟免于城者又不免于四境萬有餘人同日而死

聞者痛心叅政召申吳適之遂殺申吳暨路帥張伯子  
臨刑有雷一聲晴空而震或者疑其爲星隕也邑由是  
改名永清屬行省擢邑士黃桂開簿邑事桂開草創邑  
治于劫灰之末撫集遺亡僅存七十有二至元庚辰縣  
再隸南安復名上猶自是鄉民吳富五鍾召二李達淑  
等相繼不檢加以外寇黃青四六杜震隆董賢舉等牧  
民之官惟務用軍給餉二十餘年更無寧日奚暇顧邑  
治之綿葢哉大德壬寅邑令魏義爬梳剔抉重建公署

以新莅政之所簿尉劉彛訓革撫安赤水新民復起太  
傅書院爲化頑之計今亦瓦老木蠹惟公圖之公曰善  
十月既望遂捐俸倡僚佐官吏重修邑治典史黎懋佐  
之繼以本路照磨張景儀分符抵邑新簿蘇吉共完厥  
功越二月竣事悉增其舊制邑民請書其事余故樂書

吉安路惠民藥局記

馮翼翁

聖人之于天下有博施濟衆之仁則有博施濟衆之政  
四時五節六氣之過不能使人人無病五藥五味五穀

之養不能使人人調賦之設博士以講其學置鑿師以掌其政又憫夫貧而無告者以時給其藥餌雖一事之仁使凡有司推而行之匹夫匹婦有不獲其所者歟大德三年各郡置惠民藥局擇良醫主之使貧乏疾病之人不致失所吉安郡始創局于譙門之左外有樓中有廳旁有舍修製有具曝藏給濟有所官給楮幣萬二千緡歲收其贏以市藥劑頒于所屬州縣至正庚寅冬府推官董時儼既勤于職疏滯理寃驗醫之良者使治

因病以時藥而粥之獄以無瘼乃新藥局蠲俸以倡醫戶出其餘則合千五百緡以市木石瓦竹與凡粉繪之費逾月而訖工請書其事于石廬陵劇郡非患民病患所以病民者獄訟之繁也六氣之過成于天聖人不忍其有病而爲之鑿藥五刑之用成于人有司獨忍其無病而爲之瘡痛歟使郡之有位者皆如董君能欽舊制恤民隱推而行之豈特惠民一事而已哉

端明書院記

蘇天爵

故宋端明殿學士汪文定公諱應辰信州玉山人也年未冠擢紹興五年進士第一人方其少也遇事則正色危言數忤權姦而毋悔忌其中年多識前言徃行蘊之爲德而見之行事歷官外郡專務安靖息民而不擾入侍朝著惟欲引君當道而不阿是以民懷其惠士宗其學中外賴其用卒也朱文公誄之以文曰公學貫九流而不自以爲足才高一世而不自以爲名道高德備而不自以爲得位高勢重而不自以爲榮蓋玩心乎文武

之未墜而抗志乎先民之所程嗚呼朱子推許若此真可謂一代之碩儒天下後世皆當景仰也公歿百餘年丘墓隔於異縣里社無所尸祝逢掖之徒過其邑者孰不爲感慨思慕乎考之禮經鄉有道德先生沒則祭之于社無則猶得合而祭之若文定公德業老成材器簡重可以不變風化作興賢才玉山之人祠而祀之孰曰不宜我國家至正庚寅監縣壽安以名家之子來領是邑爲政之暇銳意斯文考之文定公邑之賢人也乃訪

求公之世孫衍社得遺文一襲于是移文申達復邑之  
舊學基創爲書院既成率同官僚吏諸生祀之邑之義  
士共施田若干畝儒學又獻會文莊田以供粢盛有司  
優其子孫丁役以奉祠事時江東憲使答不台嘉其義  
舉實爲得體覆表之曰汪文定公書院請于江淞行省  
以司其教遣使奉書求于天爵記之蓋聞時有古今道  
無古今之異地有遠近人才無遠近之別此古者以友  
天下爲未足又尚論古之人誦其詩讀其書論其世也



昔宋南渡之初文治亦盛縉紳儒者磊落相望一州一邑尊崇景仰寧無可以尸祝者乎不有尊賢好古之君子則亦孰知表章風勵以爲鄉人之儀表此文定之祠監縣壽安之所由作也方今朝廷崇尚文化開設貢舉網羅賢俊玉山之人豈無懷才抱藝出應有司之選忠君愛民若汪公之有用于世者乎相與欽慕興起于無窮是則克副監縣建書院教邑士之盛心非徒致修故事而已也

分府王公祠記

陳至言

雩都古漢縣也江之西列郡十一而贛居上游贛屬邑州二縣八而雩都居要地曾文定所謂今贛州據吳之背扼粵之項領而雩都則又贛之咽喉也自漢唐及宋率爲重鎮按其山川訪其營壘千數百年荒基廢址盖猶有可考者元混一區夏承平且及百年文教迭興武備寢弛淮寇伺隙造妖流毒江右郡縣鼎沸瓦解莽爲丘墟爲民牧者何所逃其責哉當是時守一郡爲江西

之後障者惟贛而已據一方爲贛之右臂者則以有今  
貳守王公之分府雩都也公饒智畧有膽氣議論舉措  
出人意外表寇襲破寧都府請公討之斬其首首復其城  
攻興國復請公戍之不數日督兵四出大戰數十合俘  
斬數百級賊勢大衄繼陷會昌旁邑爲之騷動于是府  
議雩都爲屬邑要衝總府去他邑遠屢寇至調兵嘗後  
以分府雩都治之則易非公不可凡寧都石城會昌瑞  
金安遠興國有警悉詣公請討羽書旁午辰至已發如

捧漏沃焦不可瞬息苟違乃斬鋤芟刈以殲大憝封養  
培植以樹餘良興仆揀敝以就緒功室釁杜蘗以絕後  
艱迄今六載猶如一日使屬邑得以去危即安而贛府  
無紛拏之擾贛府得以總制受成而右省無後顧之憂  
者公之力也公所至多選任文學理法之士以完城爲  
先務始至雩都即議築城視寧都興國有加民或以爲  
勞公弗恤比城完而循梅汀獠大發掩至城下圍三晝  
夜百計攻取公率民且戰且守曰無雩則無贛矣贛城

完固卒不可破寇退向以爲勞者皆羅拜詣謝荷公更生公不以爲德公愛民如子憂國如家出于天性信賞必罰不爽毫髮故咸用命以餘力修孔子廟福田寺通明閣及建鐘樓縣治之左在他人應接未遑而公優爲之非才力有過人者與邑士庶相與言于學以公之功在法宜書宜有褒勸之典而德在人心在子孫者無以報也宜有祠以奉烝嘗不可無記請述之夫有馮異而赤眉之叛以除有皇甫嵩而黃巾之暴以殄今天下盜所

在烏合治之不難而曠持數歲兵連禍結民未知休息之日何哉使公得大其施設民受賜殆不止此余備員鄉校喜分府公新祠在灌嬰城之西偏得望霑亭之故址居闡闡之勝都材物之良足以繫人無窮之思也公名榮忠字君直別字竹坡官奉議大夫贛州路總管府判以功陞同知總管府事湖廣之岳州人是爲記

樂平州慈湖書院贍學田記

危素

昔楊文元公之宰樂平也首倡士民興修學舍闡明心

學以崇教化未幾民翕然應之囂健馴服至今號爲詩  
書之邦向之蒙公惠澤者由今觀之皆其高曾祖父矣  
餘澤在人尚能感念之不泯孔子曰君子學道則愛人  
有以哉袁正肅公提點江東刑獄乃叔書樓于廟學之  
後入本朝至元十九年縣尹翟公衡謀于故宋丞相馬  
公專祠楊氏乃以貢士莊田若干以贍師生以供祠事  
馬公以爲宜乃得魏氏之隙地于縣治之東高明塏爽  
爰築宮其上率諸生舍奠焉事既上聞賜額曰慈湖書

院設官如令式至元二十七年抄籍延祐二年經理田畝俱作贍學田土其後不知緣由者每以貢士莊田爲辭而吏得以舞文其間至正辛巳公之五世從曾孫同翁來爲山長列其事于郡饒州路總管府知事于君凱言於郡守曰朝廷以貢士莊養士行之已久無害于法若何而靳于是上之于江浙行省行省是其言自是書院始有田素使過是州既拜謁祠下同翁具述其顛末求爲之記予惟楊氏學出于陸文安公其爲樂平也實



朱文公爲浙東常平使者之所薦也不知者紛紛然以爲朱陸異學可勝嘆哉今學院有田以自養學于其中者他日出而仕于時當以是爲師範矣

富州蠲金紀事

至元十四年分寧縣人商瓊者謀獻利覓官迺誘湖南淘金工易彬等三十餘人至豐城縣之長寧鄉留臺居焉又募其鄉人傅壽等穴山谿畚沙石習淘金爲業歲責輸浮辦金四兩重請行省署淘金場縣中領之而瓊

洎阮祥者實司其職然豐城之金僅僅取之不足以更費于時雖竭力淘采地道空虛不克供一歲之入瓊稍患苦之適使人走他州購金以實其數久之懼其妄覺又誣富民地有金掘其廬舍冢墓刳取貨賄漸增廣歲賦入以錮其事於是盡力掊克請增輸金至二十五兩九錢重以爲已功鄉民甚惡之而亡賴者景從日衆至三百三人焉瓊又爲之請於有司歲復其役豐城既無金羣轉走饒信徽衢婺江南康蘄黃歲掠以進瓊瓊輸

官而攘其贏由是致富會張國紀守撫好言利二十四  
年行省用其言置金銀場于樂安縣之小曹溪課富民  
淘金輸官程所入多寡而免其賦于是盡檄取豐城淘  
金工往教習焉瓊益以聚斂爲功復請增金三兩一錢  
九分六釐重總之爲二十九兩九分六釐重矣瓊因求  
遷小曹場官兼賦豐城金而豐城淘金場遂革是時豐  
城陞爲富州官復煩淘金家以它役始不勝其苦而汪  
壽李仲何文明等百餘人走光州不返餘徙業者相繼

瓊亦去爲鹽場官而富州金遂無所從出矣小曹官屬  
懼其久而累已也募其邑人黃德韶言于行省謂龍興  
路貢賦歲屬興聖宮則富州金不宜附隸撫州蓋從富  
州輸之龍興路爲便行省用其言下其數于富州征之  
延祐四年九月也瓊始征金時至是四十餘年矣即復  
求三十餘人者多閭閻細民死徙亡後者焉有後而乞  
丐者又有焉根連其宗族蔓延其媮黨亦有窘乏至殺  
子女以拒胥徒之隳突者乃抑令五鄉二十七都之役

于官者代輸之凡金一兩重費至元鈔多至百廿貫總之爲鈔三千六百貫矣因之破家者又比比有焉于是民之荼毒有不可勝言者矣州人思脫其禍若王季常王元實等違違間陳于有司有司稍集父老議雖悉其弊然莫肯固請于上盖自富州再征金至是又十有七年乃始得揭車之言行焉始車嘗言于奉使宣撫又言于監察御史號咷頓首乞去民害觸御史怒幾得罪賴龍興推官李崇德莫維崇力爭御史前得免至是乃言

于張公榮及章全公岳柱而二公深哀其言于是其事  
乃得竟聞而州人數十年剥膚椎髓之害始一旦脫然  
矣噫商瓊不足議矣彼天子之命吏牧此民者視其困  
苦漠然不以爲意獨何與誠使士之居于鄉立于朝皆  
若揭車及授經公侯斯其人豈有知而不言者哉風紀之司藩  
輔之宰皆張公全公其人豈有聞而不行者哉今富之人  
感三公之德而壯車言之力相與刻石以垂永久素于是重  
有感焉述文以慰州人之心而學士大夫播之咏歌以通諷

諭以示勸懲未必無小補也全公回紇人後終河南行省平章張公河間人後終司丞揭公今為翰林侍制車具從孫云

金谿縣梁安峽義渡記

撫之屬邑曰金谿其南五十里有梁安峽石壁峭險兩厓雙峙南城諸水皆會于此上游有渡曰馬頭渡峽束而水深不可徒涉臨川營前里有張昭孫伯恭慨然曰吾先君葬梁安之山中距渡才二里于是作堂以祠其父外為屋以待渡者息肩于此以浮圖普願守之割腴

田若干畝以贍舟人而并食焉既而里之有餘財者曾某吳某皆施田以助之始終贊其成者項山寺主僧師啓且以其寺近因屬永久任其事庶幾無隳吳君之子擴以書來京師與其友危素曰願有述余讀周官書夏官之職有司險焉掌九州之圖以周知其山林川澤之阻而達道路山林之阻則開鑿之川澤之阻則橋梁之謂之司險者有敵國之侵陵故也今國家盡得四方之境土固無俟乎設險以守其國故司險之官不設然道



路橋梁亦有專領之者顧有司率意于錢穀簿書之事  
以此爲迂緩不切無復加之意矣由是津渡之舟悍夫  
凶人把握其間爭纖微之利棄性命如鴻毛者蓋多有  
之雖留難之禁著于令甲而亦莫之能革嗚呼可勝嘆  
哉今張君與州里之賢豪致力于此非有所驅迫而出  
私財披腴田無少靳吝斯亦可以言義非歟乃爲書之  
以示來者

江州路能仁禪寺三門記

江州城南隅有浮圖東魏天平二年沙門祖道瘞佛舍利其中貯以水晶瓶金銀鐵石函護惟謹南唐李昇時軍帥威烈公何洙迺作佛寺號曰福聖宋遣曹翰取江州屠其城寺以舍利所在獨免于兵燼天聖間賜額承天沙門智聰大加修葺尚書禮部郎中祖士衡實記之已而名師有若白雲端佛印元鐵面感宏智覺皆相繼主斯寺號爲叢林之盛政和七年改曰能仁紹興十一年龍圖閣學士蔣璨題其榜淳熙十四年有僧來自天

台笑嘻怒罵類狂易者人目爲風和尚一旦與僧智聰  
富民巨賈爲之興修事具洪文敏公所爲記宋亡何公  
所施田在鄂之嘉魚者田人因而有之寺僧祖印本中  
宗溥應辨訟于官府弗直辨有弟子曰致堯始息田訟  
而顛力造作人爭致財縣鐘之樓藏經之殿煥然興復  
郡人李貴和施田百有餘畝山若干畝今名曰福田莊  
致堯主寺事二十有七年而退休焉至正二年行宣政  
院以南康沙門師嚴學行淳備選爲住持四方學者相

慕而至乃修僧堂衆寮百爾器備而居者始安郡人黃仁歲以穀三百五十石貸諸田人取息以助寺僧惟惠經紀寺故所有田在蛇口湖尾者六百有餘畝收粟以繼于是食粗給矣仁復以茶地若干及南郭思賢橋爲施而然鎿之費無復屑屑求諸市人六年夏大風雷雨壞三門乃溯江至荆門玉泉景德寺福祐倡施者出錢五千餘緡既還寺僧德永亦以五千緡與師巖之徒弘教購蜀之良材於荆得檜柏四百餘株以七年九月庚

申經始中爲屋五間東西各四間規制雄壯倍加于舊  
官府民庶知師嚴之公而能勤皆出錢助之九年夏丹  
牘甃礮訖工使弘教至京師求予記之師嚴之言曰吾  
佛氏之門曰三空無相無願無解脫也謂頓空我法不  
滯法相不存所願耳然斯亦曲垂方便欲其舍彼所滯  
深入一乘之門而已若夫深造上乘十方世界一道場  
也十方世界一門也十方世界一佛真法身也又有所  
謂三門耶余昔與師嚴同客金陵知其清苦好修不自

表裸故因書其作門之役而并及之

梅江書院極高明樓記

極高明樓者梅江書院之樓也書院在寧都州之北郭所以祠宋肇慶府節度推官曾公樓之扁榜則丞相信國文公所書蓋若干年矣久之樓壞會濟南趙侯天澤來牧是州儒學正臨川李君實請于侯曰樓將壓矣公其圖之侯曰吾之責也迺率州之好義者相與出力積木石傭工役而繼營之君上春官而以語同郡危素曰

吾于寧都幸遭賢侯恪承上命以興學明教爲先務故  
是樓完繕于敝圯之餘諸生既具石請爲之記蓋極高  
明之語載諸中庸其義宏矣昔者曾公遊于新安朱氏  
之門幾廿年朱氏以純茂篤實切已致思用工正當稱  
之方慶元間羣兇枋國詆排正學斥逐善類一時學者  
諱名其師曾公執禮益虔未始少挫師既歿星馳弔哭  
服心喪三年則于死生患難處之有素非所造極于高  
明其能然即以是名其樓託意深遠矣來遊于斯者馮

高而四顧山高川迴萬象軒豁超然吟風弄月之趣細  
故芥蒂無復滯留其胸次將與舞雩詠歸者同其樂焉  
雖然易傳有之智崇禮卑崇效天卑法地極高明者智  
之崇也子思子所謂道中庸者其亦禮卑法地之意歟  
因記其樓而并以所聞者質之是邦之學者云爾

信州龜峰瑞相寺記

信之弋陽南去二十有五里有山如龜南北望之則羣  
峰叢映斂焉如一東西觀之則兩山對峙南聳銳而獨



立北馮陵而臂引眈其背則橫亘峭崿如堅壁固壘冠  
首有堞面其前則攢巒複窰蟬聯星錯轟轟嶷嶷更相  
朝捧其將至也四視環合若無從而造焉既而縈厓繚  
岫斗折以入環以羣山而峰之得名者有二一峰曰石  
蜃能吐納雲氣以占雨暘其中峰曰石龜唐乾寧中僧  
茂蟾作寺其下名曰靈勝至宋真宗改曰瑞相太子少  
保趙公抃龍圖閣學士韓公元吉皆嘗賦詩丞相陳公  
康伯請于朝更曰顯親崇福寺今復名瑞相其寺僧有

得于其學者子瓊光應重仁事載傳燈錄其有道而居  
是山者曰晦庵光雲庵慶曹原生山堂淳柏庭永孤雲  
權其由此出主名刹者徑山蒙庵聰雪峰螺庵肇觀其  
人則知其足以爲茲山重也國朝廷祐五年禪師從正  
主是山明年有鬱攸之變逾十年規制悉復舊觀又三  
年以老求退薦禪師德學自代八年之間法席大盛至  
元五年燬于火曰此殆天數豈不聞成住壞空復率諸  
好施者鳩工掄材雄麗倍于他日于是使其徒行觀來

京師屬余爲之記今國家崇尚釋氏崇墉峻宇徧于京  
邑大者縣官作之嗟乎勞民力而求福田豈佛之心哉  
觀夫瑞相之興獨因其州里之有餘賢者相與成之則  
正學二師之行孚于其人可知已抑其山川之勝足以  
致其徒坦坦施施而來趨焉則繼傳燈而見于紀錄者  
將相望而出余故考昔人記其地形而述其顛末使并  
刻之

雲林圖記

雲林山在金谿縣東山繇大庾嶺歷贛建昌之南境入邵武之光澤有山高千二百丈漢初徐仲僊遇仙之所至烏佩山仙人烏君上升時委玉佩處過大和山小和山委蛇而走南城達于金谿之境其高上摩霄漢者三十六峰其中峰最高者曰石碓其左曰白馬又名玉馬以其形似也上有浮丘先生祠浮丘先生者或云姓李黃帝時人或云周靈王子晉其弟子王郭二君俱陳留人訪其師至此然臨川境內多有其祠焉其右曰厓山

山勢起伏九十有九其深谷產靈藥異草本草云臨川  
士人家婢食黃精能飛者意其處也山頂多石磴飛瀑  
其名曰磴有深潭廣一畝古木蒼藤陰翳慘澹神龍居  
之宋有沙門師劉中宮自蜀來此結茅居民苦旱問之  
乞雨師云今歲數當不雨吾憫爾貧雖雨才沾足蔬畦  
而已他日師入潭中遺履石上涂容者守其履俟之七  
日師自外至謂容曰汝可謂誠篤問其所欲曰吾惟嗜  
鴨肉今禱雨者必先以鴨祭麥然後得雨師嘗謁撫州

守書刺曰恭龍僧某守惡其幻詰之曰龍安在師曰明  
公勿驚以金槃盛水探懷中若朽草置水中風雨大至  
龍飛躍而去鄧氏自五代居山下宋建炎中苗傅劉正  
彥作亂鄧雱集民兵追破其黨號忠義社于後累立戰  
功捍禦一方入國朝設巡檢至元末天下已定乃罷今  
山谷猶有壁壘在焉近厓山有神童峰方仲永者蚤慧  
生其下荆國王文公所作傷仲永是也入南城貴溪有  
曰豪豬關甚險絕余嘗與今德慶路總管知事楊君季

子訪故潯州路總管府經歷祝蕃遠先生于太原僧舍  
猶應劭所謂前人見後人頂後人見前人履底毒蛇奔  
狐時出草間蓋畏涂也又嘗與祝先生夜宿田家白雲  
滿谷獨聞水聲而已余所居高橋有小溪發源山麓至  
元廿一年先大父白鹿府君繇邑之梯雲坊徙居于此  
讀書之室曰處一堂開窻正面諸峰韓子云橫雲平凝  
時露數岫修眉新畫浮于天宇與此甚類余少肄業其  
間有書若干卷皆先世所藏歲縮衣食之費增若干卷

三代以來碑刻若干卷有琴一不上絃獨以先父太常  
府君遺戒不設奕具耳蜀郡簡君天碧與余客吳文正  
公所爲作雲林圖道士方壺子亦愛余山居幽僻數爲  
圖張彥輔真人奉勅寫欽天殿壁余時在經筵用米氏  
法爲余圖之翰林侍講學士虞公嘗爲賦詩海內之名  
勝相繼有作于是有聲之畫無聲之詩悉萃于几席南  
金大貝不足爲貴矣然故舊從而以雲林爲余別號則  
非余志也上古簡質稱名而已周之彌文乃有字焉有



字而不以稱又爲之號末世之蔽也況昭武黃長霄近  
集賢宣城貢文靖公勾吳倪元鎮皆號雲林子余于三  
君子無能爲役敢襲其號乎間以圖求詩于秘書答祿  
君道夫道夫曰吾既未能即其地子盍爲記以副此圖  
至正十年十有二月辛卯寄居城南頭陀寺雪下盈尺  
道無行人夜展圖玩之忽憶去家十有四年左親戚棄  
墳墓竟何爲哉在今式中歲之後亦許致仕明年四十  
有九距納祿之年固非遠矣幸而清朝從其蚤退歸與

樵夫野叟嬉遊山間上下雲月歌諸公之詩亦足以自  
樂也

石鹿書院記

至正六年番禺陳君楨作書院于饒州安仁縣之瑄溪  
又四年十月庚子甘露降于松樹日光映之瑩若膏沐  
而光采爛然飲之其味如飴衆奔走相告以爲陳氏之  
瑞始君得勝地于所居之近翦雜榛棘值微徑草樹蒙  
密地勢斗絕乃盡力攀緣睨之不百舉武而豁然平行

環以羣山中爲方池鑑虛涵碧陟其顛喬木成林石磴  
蔽虧兩石傍倚研然如蚌蛤有石昂首若靈禽之翔因  
名之曰鳳鳴臺三石之最竒者在其東中峰削立平若  
敷席曰磐石折而西爲亭曰含光亭又西大石圍頂方  
跌宕若樹碑碣稍前爲上谷厓之田者曰生雲突然埵者  
曰雪丘窪然坎者曰鹿泉君于是即磐石之下爲書院  
授徒其間中祠孔子別爲山房以度藏先世書籍及甘  
露之降復爲亭以志瑞暇日馮虛四顧千里之遠近在

日暎烟雲風雨變態萬狀超然塵垢之外萬鍾之祿千  
駟之馬不願易也因其姍友臨川孔君瑛來京師俾素  
爲之記素聞君之先出自九江之義門家法之懿踰數  
百年雖散處它郡而流風餘思未盡泯沒君篤于孝友  
鄉里信之宗族稱之顧其志願無所慕乎其外而婆婆  
游行于水石之間與其門人子弟講說先王之遺經世  
孰有踰其樂者乎誠使一家之善推而化行于一鄉遠  
而達于一國人人有士君子之行則其爲瑞莫大焉甘

露之瑞斯爲之兆歟君字士周

南豐縣治記

王澄

南豐自陞州幾百年州之賦爲石不過萬四千戶不滿  
三萬雖曰州其實邑也然民頗知服農畝僅以衣食自  
給歷年既久生齒日滋村落綿亘邑屋櫛比民不知兵  
歲在壬辰兵革忽起閭井焚蕩越六年壽光裴侯彥直  
來守視事二年而譙樓始克復舊已亥秋八月閩人受  
攻急乃以偏衆來侵州爲緩師之計樓復燬官舍內外

蕩然惟儀門獨存吏即之以爲治事之所明年正月漢陽程侯瑞來莅事徬徨顧視因諭于衆曰凡官守所以出政令督賦斂以理乎民也不謀更始曷稱具瞻乃捐已資市材于素產之地揆日鳩徒首創公署其左幕長之司其右更衣之次列兩廡爲吏舍不三月落成繼治其後爲步廊如前之制又明年作後堂橫敞洞達比舊制又亢爽是歲冬即樓之故基增築更甃高廣堅緻乃爲樓重簷復棟壯麗有加于前于是聽政有所宴休有

齊譙樓下漏以警昏聩邦人稚耆易其觀聽莫不曰吾  
儕小人徒聞斧斤之聲而不知財之所自出力役之交  
作而民不知告勞是孰使之然哉先是凡州有造作有  
司稽其版籍之竒贏吏胥並緣爲奸以甲移乙民懼其  
害不可勝言今侯不資于民孳孳焉不遑朝夕視之若  
樹已業欲以傳之子孫然其用心爲何如哉侯爲政廉  
謹不以一毫之私自黷凌晨治事日晏方罷隨事剖析  
庭無留訟他如飾館舍創郵亭造浮梁以便涉新坊巷

之顏文廟醫學漫漶者增以鮮朽腐者易以堅不急之  
役未嘗妄興威行愛立政清事舉可爲循吏也已宜  
書

釐正鄉賢祠記

徐觀

鄉賢有祠其權輿于古先生歿而祭于社與今天下學  
廟先聖祠先賢有自來矣信永豐縣學由唐相柳渾祠  
祀唐校書郎王貞白以下諸賢歷年滋久學官視爲故  
常聽訛承舛往往以已見傳會其間殊失尊賢之初意




至正乙酉里士舒彬遊京師謁太史危素獲覩宋史全文及宋禮部侍郎鄧光薦所撰填海錄諸書知諸賢德業著在史冊班班可考因錄成編以歸并得危太史所書鄉賢祠三字援教諭鄱陽操琬得釐正神位合祀于祠歲壬辰東平宋侯來宰是邑始新其扁命教諭天台陶凱各立小傳附于縣志事未遂陶以公委去侯于是命儒士周師會攝學以相厥成周君承侯命恐弗勝任乃與學賓序上饒鄭貴孫集思并智乃叅稽郡縣志書

碑銘墓碣有足徵者自唐宋迄今得二十四人他有官爵無德業者不與焉秩其名字里居仕隱始末表以出之以忠義則張叔夜黃從龍二公爲稱首以孝行則柴淵周克恭爲純至若王貞白仕止適中周日章窮不易操施舜顯施師點之直躬行道舒杲趙崇槭之救弊拯艱徐宗仁趙崇源韓光國之捐軀報國蔣夔蔣傳之決策倡義俞琰之興學俞克堪之蒞政徐尋得安定胡先生之正學徐維上書斥秦檜之奸邪周天驥受李心傳

魏文靖真文忠之知詹應陳之赴義徐炎午之恬退俞  
申之博學俞澂之卓行俱有關於風化其大節細行見  
諸各傳自今伊始奉祠益虔潛德幽光洋洋如在學者  
遊是學拜是祠庶幾想像諸賢之爲人以無負國家之  
倚賴若徒以友一鄉之善士爲未足嚶嚶然曰古之人  
古之人而無尚友之實則豈侯所望于今日者哉雖然  
是碑所記特文獻之足徵者耳祠祀有未盡採摭有未  
詳引而申之則不無望于後之君子至正十六年歲次

丙申三月望日記



江西通志卷一百二十八